



**JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL**

Komunikadu Imprensa

Periodu : Outubru 2010

Edisaun : 18 Outubru 2010

**JSMP organiza *workshop* konabá kna'ar Parlamentu iha Suku
Sananain**

Judicial System Monitoring Programme (JSMP) liu husi Unidade Programa Observasaun Parlamentu (POP) iha Quarta feira, 13 Outubru 2010 liu bá, hala'ó *workshop* no fahe informasaun konabá kna'ar Parlamentu Nasionál no publikasaun JSMP nian hanesan buletin no komunikadu imprensa husi POP nian ba comunidade iha Suku Sananain, Sub Distritu Laclubar, Distritu Manatuto.

Luis de Oliveira Sampaio Direitór JSMP hateten katak, hanesan mos atividade iha distritu sira seluk objetivu husi *workshop* no atu fahe informasaun, no aumenta no kapasita liu tan povu iha área rural nia koñesementu konabá prosesu lejislativu, atu nune'e sira bele hatene diak liu tan sira nia representante nia servisu iha uma Fukun Parlamentu Nasionál. Liu tan nia hatutan katak atividade sira hanesan ne'e importante tebes no persiza habelar bei-beik atu bele lori besik informasaun konabá prosesu servisu parlamentar ba iha area rural sira.

Husi atividade *workshop* no fahe informasaun ne'e, comunidade Suku Sananain kongratula JSMP nia servisu tanbá bele habelar informasaun to'o iha baze. Aleinde ne'e comunidade iha area refere mós aproveita oportunitade ne'e hodi hato'o sira nia hanoin ka pedidu importante balun mak hanesan tuir mai ne'e:

- Husu ba membrus Parlamentu Nasionál, atu halo fiskalizasaun to'o iha área rural, hodi haré diretamente povu nia susar no nesesidade.
- Husu ba membrus Parlamentu Nasionál sira, atu ejije membru governu sira ne'ebé halo ona promessa atu realiza sira nia promessa ne'e.
- Husu ba membrus Parlamentu Nasionál, atu hatudu sira nia ezemplu diak ba povu liu husi disiplina oras no hado'ok aan husi hahalok aat, hanesan hasai lia fuan la diak ba malu iha uma fukun Parlamentu Nasionál nian.

Bazeia ba JSMP nia observasaun ne'ebé hetan durante atividade fahe informasaun hirak ne'e, comunidade hot-hotu kuaze iha ejijensia hanesan deit, liu-liu sira husu atau distintus deputadus sira ba hakbesik-an ba povu iha area rural hodi rona no hare rasik povu nia moris.

JSMP hein katak, husi rekomendasaun ka ejijénsia ne'ebé partipantes sira hato'o iha workshop no disaminaun informasaun iha suku Sananain, Distritu Manatuto, bele enkoraza liu tan distintus deputadus sira, atu halo servisu ne'ebé iha kualidade hodi produs lei ne'ebé refleta duni povu Timór Léste nia moris.

Atu hetan infórmasaun kle'an favor kontaktu:

Luis de Oliveira Sampaio

Direitór Ezekutivu JSMP

Diresaun e-mail: luis@jsmp.minihub.org

Landline: 3323883